



Gudarien etorbidea, z/g 20140 Andoain



zuzendariari@egunkaria.com



943 300 228

OHARRA: Ahalik eta iritzi gehienek izan dezaten tokia, ez da komeni makinazko 15 le-
rro baino luzeago idaztea gutun hauetan. Idatzi duenaren izena, telefonoa, helbidea
eta NAREN zenbakia agertu beharko dira. Laburtu behar izanez gero, zuzendaritzak
bere esku du horretarako eskubidea. Erdaraz iristen diren gutunak ez dira argitaratuko.



zuzendariari

Gotzon Belokiren eskubideen defentsan

Gotzon Beloki Ortuzar Aranju-
zen espetxeratuta dagoen preso
durangarrak espediente bat jaso
zuen joan den apirilean. Hil
horretako 24an, alegazioak eus-
karaz aurkeztu zituen, eta
hurrengo egunean instruktorea-
ren erantzuna jaso zuen ondore-
ngo esanez: «En primer lugar usted
conoce perfectamente el idioma
castellano que es oficial en todo el
territorio del Estado y, en segundo
lugar, el euskera no es idioma ofi-
cial en la comunidad de Madrid,
que es el territorio nacional donde
usted realiza sus alegaciones. Por
consiguiente, usted puede ejercer
su derecho de defensa en castella-
no».

Hau guztia horrela gertaturik,
Berbaro elkarteak, Abarrak AEK
eta Udal Euskaltegiko langileak
ondokoa adierazi gura dugu:

1. Gotzon Beloki preso duran-
garra Berbaroko bazkidea da, eta
hainbat urtetan jardun du euska-
raren aldeko zereginetan.
2. Aipaturiko instruktorearen
erantzunak ez du legea urratzen
Estatu Espainolean, legezkoa da.
3. Era berean, legezkoa eta
eskubidezkoa da Gotzon Beloki
preso durangarra euskaraz bizi
ahal izatea.
4. Eta beraz, dei errimea egiten
dugu Gotzon Euskal Herrira
ekartzeko, bere herritik al bait
gertuen, dagozkion hizkuntza eta
bizimodu eskubideak bete daite-
zen. **Gorka Barruetaña** • (Ber-
baro elkarte, Abarrak AEKko
irakasleak eta Udal Euskaltegiko
langileen izenean) DURANGO
(Bizkaia)

Oñeder zabortegia: goitik bete, azpitik hustu

Azkoitian altzairugintzako hau-
tsekin dugun arazoa aspaldidanik
nahiko ezaguna egin zaigu. Ber-
tan dugu Oñeder zabortegia eta
beronen ondorioak gero eta larria-
goak dira. Zabortegiak ingurune
osoa kutsatzen jardun du bere
ibilbide guztian, eta ur kutsatuen
isurketak (lixibatuak) zabortegia-
ren berezko funtzionamenduaren
osagarri dira.

Oñeder zabortegiaren aurkako
asanbladak azkenaldian lau ana-
lisi egin ondoren, emaitzek garbi
azaldu digute egiten dituzten isur-
ketek daramaten metal astun
kopurua. Oñederrek ur kutsatuen
filtrazio etengabeak ditu eta izan-
go ditu. Bertan pilatzen den hon-
dakin toxikoen kopurua, arrisku-
garritasuna eta metal astunek
bizidunengan kalteak egiteko
ahalmena urtetakoa izanik, Oñe-
der Urola bailarako bizitza guztia
pozoitzen duen zabortegia da.

Arazo honetan inplikaturik dau-
den erakunde guztiek ondotoxo
dakite hori. Beste gauza bat da
inork ez duela ezer egiten, enpre-
sa handien interes ekonomikoak
tartean direlako. Hasi Uren
Zuzendaritzarekin eta Julian
Alzate Gipuzkoako arduradunare-
kin. Beronek aspaldidanik isurke-
ten berri izan bazuen, baina hala
eta guztiz ere, neurriak hartzeko
eta Oñederko «delinkuenteak»
zigortzeko inongo asmorik ez digu
erakutsi. Eusko Jaurlaritzako
Esther Larrañaga Ingurugiro
arduraduna, Oñederko enpresa-
rien jardura kutsatzaileak
babestera mugatu da.

Azkoitiko Udalak arazoa ezagu-

tzeko, herritarroi informazioa
zabaltzeko eta kutsadura sortzen
dutenen aurkako neurriak hartze-
ko orduan inongo ekimenik ez du
gauzatu, eta Udala esaten dugu-
nean bertan partaide diren alder-
di politiko guztiei zuzentzen ari
gara. Zabortegia bete artean zain
egotea erabaki dutela dirudi, Hie-
rros Eginoko Zabortegiarekin era-
kutsi diguten modura. Bertan,
GSBko hondakinak pilatu zituen
Jose Luis Zurutuza Arratibelek,
inguru guztia kutsatuz eta bere
poltsikoa ongi betez.

Etekinak agortuta, zabortegia
erakunde publikoen esku gelditu
da, eta herritarren kontura
berreskurapen plana onartu
berria izan da. 100 milioiko gas-
tua guztion artean ordainduko
dugu, eta bitartean, kutsadura
horren arduradun zuzena Jose
Luis Zurutuza Oñederko nagusie-
tako bat denez, gauza berbera egi-
ten ari da Oñeder zabortegiarekin.

Bestalde, salatu nahi dugu
Oñeder zabortegiaren aurkako
ekintza baten ondorioz zabortegi-
ko kamioi bat gelditzeagatik, 5
laguni 2 urteko kartzela zigorra
ezarri dietela bakoitzari.

Zabortegiak hasieratik isurketa
etengabeak egin arren, ez dugu
inongo zigorrarik jaso, baina 5 lagu-
nei berehala ezarri nahi diete zigo-
rra. Xabier Elias Oñederko jeren-
teak sartutako salaketa horretan,
garbi azaltzen da guztion osasuna
eta ingurugiroa defendatzea isur-
ketak egitea baino larriagoa dela,
behintzat justizia eta enpresarien
interes ekonomikoak gauza bera
direla uste dutenentzat. **Luis Ola-
no Etxabe** • (Oñeder Zabortegia-
ren Aurkako Asanbladaren izene-
an) AZKOITIA (Gipuzkoa)

galdeiozu...



Xabier Saldias

• ABESLARIA •

**Herriz herri eta jaiz jai
ibili izan zara. Zuen
emanaldiak ikusiegiak
izateko beldurrik ez al
duzu?**

Miren Agirre [Tolosa]

■ **HOGETA HAMAR** urtez
herriz herri ibiltzeak alde ba-
tetik arrisku hori badu. Iku-
siegiak egotea eta sorpresa
berezirik ez. Baina beti ari ga-
ra berritzen bai taldea, bai
abestiak, nahiz eta betiko il-
dotik jarraitu; hau da, abes-
teari ematen diogu garran-
tzia, eta beharbada hori egon-
go da modatik at. Baina
itzuliko da, gauza on guztiak
bezala. Gainera, jende hel-
duak ongi abestutakoa apre-
ziatzen badaki. 49 urterekin
ez naiz bihurtuko moden mo-
rroi.

Abuztuan ez da izango
Galdeiozu atalik. Irailetik
aurrera pertsonaia
gehiagorekin itzuliko gara.

• MONTXO •

